



## إكتب حاجه...!!

إكتب حاجة نافعة مفيدة  
يمكن بيها...تصلح حال  
حكمة.نصيحة...أو تنهيدة  
إبعد بس عن أي خيال  
فضفض إحكي حكاية جديدة  
قول تجربتك ياللا ياخال  
قلبك حب في ليلة سعيدة  
وسهرت ليلك في إنشغال ؟  
خانك حبك مع واحدة عنيدة  
غدر وهجر ومفيش وصال ؟؟  
ولا بقيت علي الحديدية  
وضاع مالك علي الأندال ؟؟  
فقر وذل..أنواعه فريدة  
ورزقك ضيق وبختك مال ؟؟  
حيرة وغيره قوية شديدة  
وشايل من الهموم جبال ؟؟  
قلة حيلة شايفها أكيدة



## بتاع كلام



ومهما تدعي الإجابة محال !!؟  
أمراض خبيثة أمراض حميدة  
ومش ملاحق علي قلنا وقال ؟؟  
قلة نوم وأفكار بليدة  
وعقلك نفسه يسأل سؤال !!؟  
ليه الدنيا أسية عنيدة  
داحنا ضيوف...بعدين ترحال !!؟؟  
ليه فرحتنا عنا بعيدة  
ليه الأحزان عالراس تتشال ؟؟  
عايزك تكتب أحلي قصيدة  
ولا تألف ....كام موال  
إبكي وفضفض قول مآساتك  
يمكن تهدي...ويهدي البال  
جايز تلقي حاجة في حياتك  
حلوة وفلة ..وعال العال  
إبحث بس عن قيمة لذاتك  
وانت تلاقي... كل جمال  
وعجبي...!!

